

健餘先生文集

二





集文生先餘健

(二)

尹王會擊一珍  
著編

中華民國二十五年六月初版

徐

一四三三上

編主五雲王

叢書集初成

健餘先生文集

册二

著者

尹會

擊瑜

一

發行人

王雲

河南路

五

印刷所

上海

河南路

五

發行所

上海

河南路

五

印刷所

上海

河南路

五

發行所

上海

河南路

五

(本校對者蔡仲宣)

# 健餘先生文集卷五

書

上朱高安先生書

某啟。四月旣望。戴唐回揚齋到鈞札。示以張弛之宜。兼賜歷代名臣傳。再拜盥誦。不啻親聆提撕。字字箴銘。時時佩服。匪獨兩淮情形。從此揆其體要。卽一生仕學。亦幸得所指歸矣。師傳遠大。厚望殷肫。某雖魯鈍。敢不彊勉力行。以步趨於門牆之内。目今署理鹽政。仍管運司事。朝夕不遑。而於晚刻篝燈。必觀名臣傳一个。以自循省。其能有獲心者。不禁躍然思起。有未逮處。不禁爽然自失。比來讀至漢季。見朱雲以故令而躋於名臣之列。尤覺開拓心胸。增長知識。人苟能自樹立。以身負天下之安危。雖不公卿。亦謂安社稷之大臣。公卿而或依違奉令。無所謂深識大力。祇爲具臣。如匡韋之優游養交。張禹之妨賢病國。雖位極人臣。不過患失之鄙夫而已。反覆由繹。足以廉頑立懦。非吾夫子之處一化齊識。絕千秋無以創此義例也。曩猶見爲大行大效。必待乘時遠駕。今則益信盡其在我。無假異日。惟有彌堅素節。以求自立。願外之念頓息矣。未審將來可以不辱師門否。仰請指誨。伏惟崇鑒。某再拜。

高安先生復書曰。體驗親切。是真讀書人語。篤信好學。自爾不凡。揚州政蹟。已見有成。將來造就。尤未可量也。

復朱高安先生論興水利書

頃承垂詢水利事宜。此非某之迂疏所能爲役也。然據目之所見。不敢不以實對。稽古治田。未有不興水利者。不獨南方爲然。前朝徐貞明、徐光啓言之審矣。顧其意專在水田。於北地未盡相宜。夫田有二。一曰水田。一曰旱田。旱田亦有二。一曰有水旱田。一曰無水旱田。水田者。下地浸水。其中專以藝稻者也。故周禮有稻人一官司稼下田。詩曰：澣池北流。浸彼稻田是也。有水旱田者。旁有河或池塘。種黍稷粱麥之屬。旱則用水灌之。不旱則不用水。惟平土而種藝之可也。無水旱田者。旁無河塘可灌。惟恃天澤。詩言雨雪。震霖。以生百穀是也。北方水田少。旱田多。有水旱田少。無水旱田多。故禹開溝洫。治旱田耳。鄭康成注周禮曰：溝洫爲除水害是也。蓋北方大局。旱則赤地千里。潦則洪流萬頃。用水之時。每苦無水。不用水之時。偏苦多水。故治北方之水者。去水害爲易。興水利爲難。則去水害爲急。興水利稍緩。不能盡依蓄洩之方。一時並行也。縱觀畿輔之內。自永定以南。漳河以北。其間若易水。若淶水。若拒馬河。若琉璃河。若灘水。若唐河。若瀆河。若三岔河。若滹沱。若滏水。以至甯晉之南。泊新安之北。淀其水有源。冬春不斷。蓄洩之法。正宜施於此地。且其地原有種水田者。因利而行之。亦修其弊。舉其廢耳。此本足爲利。而即可以去其害者也。至如恆山以東。行唐定州諸邑。爲沙河上流。無水可見。亦無岸可循。彌望皆白沙而已。六七月間。雨多水積。從山而下。上闊下狹。入祁州安平諸邑。一夜橫灘數十里。其勢與滹沱等。此不足爲利。而止宜急去其害者也。又平原之地。開溝洫未嘗不足以洩水。太多則損田而瘠土。所入不足相償。土性鬆散。旋開旋淤。溝洫兩旁近地。勢必灘溜。亦不可爲田。此雖足爲利。而亦宜早防其患者也。夫遇千載難逢之時。欲造

萬世無疆之福。生其地者亦惟幸觀厥成已耳。而芻蕘之見不忘千慮者誠以偶聚之水與常流不同。黃壤之土與塗泥各異。相其地勢因其土性可爲水田者爲之不可爲者祇開溝洫以治旱田利於少不利於多疏濬各河下流以通積潦利於深不利於淺。準今正所以法古從俗亦所以便民樂成之業慎於圖始則一勞永逸有備無患矣。否則取效於目前而不爲久遠之計水利方興害即隨之將有貽累無窮者誰識其咎伏惟審察某再拜。

上邁大司馬論辦軍需書

頃奉憲札酌撥營馬二千匹湖北驛馬二千匹湖南驛馬一千匹再勸公項買馬一千匹先期齊赴襄陽交收喂養是撥買馬匹合計六千匹以每馬日給料三升草一束計之每日需豆一百八十石需草六千束不惟襄地褊小購買維艱且按二馬一夫之例又需召募馬夫三千名一時實難雇覓亦且多費工食雖偏處一隅不識全省營制但敬繹上諭將附近陝省之各標營馬兵內揀選二千名預備聽調是所揀選者乃各標營之馬兵耳其馬兵本名下原有騎操熟馬一匹今奉旨每兵照例給馬三匹除原有一匹外每兵止須給馬二匹似無庸另撥營馬二千匹先赴襄陽喂養至所撥南北驛馬三千匹俱係各州縣驛現在支領正項錢糧喂養在槽之馬自必臃肥與其不論道里遠近一概委解襄陽交代喂養何如分別營驛相去遠近卽將所撥驛馬分解附近各營令各州縣驛自行喂養按日開銷俟營兵起行之時各營按數撥給兵丁駄載衣裝器械前赴襄陽或候齊起行或分路先行是開銷總屬一樣而煩簡勞逸輕

重懸殊在襄陽固可省大半之採辦而兵丁亦得仍騎原喂之熟馬矣儻愚言可採伏乞迅賜檄飭各營驛照行并請批示以便酌量採辦

答沈副使論鹽法書

前發口岸規條深恐匣商賣商錮習難破希冀阻撓曾專札奉致加意振刷庶場疲之口岸可以稍興今接來教稔知卓識定力素所挾持斷非被商人搖惑而然不過因鹽法一事尙未熟思切究是以屢易其說而多有未當耳卽如口岸價好易消則商運羣趨若驚若價落難消則商運裹足不前此固貪利之常情惟在身任督銷者設法疏通至於督運之官不可聽其觀望亦當設法嚴催此說誠是矣若以運數之多寡較量匣費之盈絀則與僕之初意甚不相合蓋設立公櫃准收每引三錢者不過因從前所收過浮暫准扣收三錢俟綱竣核算再爲酌定耳豈以減存之冊不過三萬九千餘兩卽商人自開浮用之數亦不過五萬餘兩而顧慮十七八萬之綱引扣收三錢尙不足用乎所謂向之五錢卽今之三錢鰥鷗計較亦殊不必矣至以匣費爲各商私家之事不必代爲節縮此局外之常談非吾輩所宜出也夫減費恤商屢聞明教矣歸公之各項與浮濫之匣費均係揚商成本已經歸公者旣格於部議而不能減力所能減者又阻於浮論而不果行是終無恤商裕課之一事矣政體當不如是且足下將以歸公之規費爲甚於浮濫之匣費乎亦未親理其事確查其數而深悉其重輕耳若慮開報不實此乃從前商人之慣弊是以設立印簿責令實填豈可仍聽捏開且就其所開款項亦可核其應銷與不應銷固不能保其款款皆實

也總之清理匣費在所必行且自庚戌核減定冊曾經部議官員濫收責在督撫商人濫送責在鹽政行知在案但一查閱卽知此事之所關尤重更不得再爲因循釀成大案貽累無窮矣今僕意欲不究旣往但定將來獨坐籌畫至十餘日而後定此中已大費苦心全賴同舟協力方克有濟儻有真知灼見應行應止之處不妨再賜直言庶懲與懲相投而虛心明辨總期歸於至當是乃君子之交是乃協恭之誼也病中草草布復不宣

復合河先生論禁酒書

范生回汴接奉手書諭以天德王道不遠人情專心德化慎無立法所以教某者切矣獨是法立而弊生雖亦勢所固有而酌情與度理更當權其輕重如酒麴之禁夫子立議謂宜寬法以便民誠爲不遠人情矣而某不能無疑者蓋飲食男女人生之大欲存焉先王曲體人情而因以爲治又懼其過而流無所底止也故禮防其未然而法禁其太甚譬之江河謂防之過迫而虞其潰決信有之矣若謂盡撤隄防而後安流無患有此理乎夫酒猶色也人情雖不可遏而大防終不可廢此乃理欲生死之關從古以來經史所載未聞直以酒禁爲宜弛者乃自當代大儒發其端而又堅持其說天下後世將謂之何某之事夫子所謂步亦步趨亦趨者獨於此事未能了然於心而行之無疑敢布其愚以望明訓

與東章館師時溯尼書

睽違梓里十有餘年每憶親朋形於寤寐獨念足下自少醇謹不流儕伍積習是吾同志而堪進取者故

前囑鄉族延主義館遙聞設教以來牖啓童蒙彌加靜正深慰遠懷自茲以往所望於精進者匪淺大約鄉無善俗世乏良材皆由童時不從小學入手故多頹廢侈肆難與言善終鮮成德耳嗣後可令諸童各備小學一本吟誦講習先明大指然後逐節體認久久習慣自然變化氣質存心制行日趨於善且心明理順學文更屬易易匪迂談也夫吾鄉子弟之失學亦甚矣禮義二字全不知爲何物家信舛謬至不可卒讀詢所行爲令人駭歎爲今之計亟宜從小學植基若非館師以身立教酌設條約整齊化導將來何所底止萬望專心致志共勉有成毋爲家計所累恐薪水或有不足已囑廣志等不時籌畫矣二千里外言不盡意惟祈知此心之所向則如對几席此致不宣

答龐石周書

足下素所挾持生知之最早亦最悉別後勳名事業雖僅得之傳聞私心每多慰藉併來接讀手札始稔十餘年來險阻備嘗忠勤匪懈深幸吾黨有社稷臣爲之喜而不寐矣至於不負所學此語甚好但須分明誠以所學有偏全其不負亦有大小義利之介辨在幾微氣節相尙究非根柢必自反所爲無一客氣則篤實輝光日新其德功名固其外氣節亦協中矣所就甯復可量耶生自念從前所學散漫無歸以致事上接下之際矜情躁氣時時與人抵牾不能自克因請教於高東軒先生曰只欠讀書耳問欠讀何書曰小學近思錄生初聞猶未深信及熟復體驗爽然自失邇來氣質稍化賴有此書常置案頭始信過來人語不我欺也楊方來十年不晤未悉其行但聞日下多贊之者果能廉隅自飭內蘊文明則狷固次狂

亦君子所取。或於地方一無建白。則是中無所主。可致愚意相勉。亦良友忠告之義。遠將方物。殊於寒餒。不倫嗣後。惟宜便寄數行。以慰懸念。多儀非所望也。使旋匆匆布復。不旣。

與陳密山書

前閱邸鈔。敬悉直言讜論。上契宸衷。私心竊喜。以爲剛健篤實。大兄自此其輝光矣。未幾而秉藩之捷音。卽至。聞者莫不稱快。益信吾人之學。惟其眞者不可掩。而誠能動物。實有其不爽也。惟願敬義夾持。知行遞進。充積日盛。而發見以時。無負主知。與人望爲禱。雲倬榮遷大農。於賀札中。曾贅迂談。乍見未必不怪。想亦諒此愚忱也。豫省近無善狀。獨分社一事。循良有司。頗能鼓舞士心。蒸蒸向往。若行之能久。諸務俱有提綱挈領之機。不患阻隔矣。至某當漸老易忘之年。絕少精進工夫。偶有翻閱。覺萬語千言。總不出乎四書之蘊。始知孔孟心傳。約要而該。由之不盡。向所講求。不過爲帖括生活耳。嗣今以往。未知所見所習。可對吾兄否。頃接家報。知大兒與二姪。都門同寓。臭味甚合。兒輩又能同方。亦兩家幸事也。

答陳密山書

接奉手教。大慰遠懷。惟是獎揚逾分。殊切悚惶。某向日所學。毫無把柄。難逃知己洞鑒。垂老之餘。深懼泛泛悠悠。模糊到底。遂與草木同朽。每讀呂新吾、鹿江村、孫夏峯諸儒語錄。方寸間實有開擴警省處。而行之不力。悔吝滋多。同志如大兄。雖遠在數千里外。所望於切琢者匪淺也。前讀奏摺。肅然起敬。訪之輿論。無不稱快。是大兄爲理學名家子。當有道之時。所以立身報主。見重於鄉國天下者。正賴有此。某方以剛

健篤實直內方外。期吾兄之加勉。若聞仲氏吹箎而因以爲戒。其將何以自處乎。竊謂吾人之志既不在溫飽。則言所當言行所當行。置毀譽利鈍於度外。乃素位而行之道。明哲之義。即在其中。與孟浪懸殊。願大兄之熟思而堅守之也。醇叔之疏懶。雖久闊未能深知。大約亦志之不立耳。胸無主宰。一身之血氣官骸。且提轉不起。何況由中應外。推之千變萬化耶。此過所關。亦自不小。吾輩所當深戒者。大姪休官。安知非福。但至今未聞旋里心甚懸懸耳。迂闊陳言。用以涉世。則疑於狂。用以持身。不詭於正。大君子自有決擇也。豫省夏秋以來。雨水爲災。皆某涼德所致。兩經具摺自効。未蒙罷黜。在某諸凡據實直陳。誠不免於張皇激切。以視從容坐鎮潤色治平者。自覺懸殊。然目擊民艱。難容稍諱。現在單心補救。深虞不逮。素叨知愛。幸賜指誨爲禱。

密山復書曰。連接手教。認理極明。信道甚篤。懦夫聞風。已有立志矣。閑抄知豫中大水。百方補救。條奏諸款。深合機宜。想見拯溺哺飢。寸心欲碎也。榮癮以爲災祲之生。在衰世則天以之啓禍亂。在治世則天以之試聖賢。非此不足見仁人愛民之深。憂民之切也。堯湯不免水旱。水旱乃見堯湯。昔朱子守南康軍。講求荒政。可爲萬世法。朱子豈不能感召休和耶。易曰。雲雷屯。君子以經綸。天地屯難之時。乃徵旋乾轉坤手段。榮非故爲諛詞。實係確有所見。但君子遇此。當恐懼修省。以盡人事。不可謐諸運數之適然。以朱子之心。行朱子之政。惟仁人勉之。

與劉今衡書

楊藩司過汴。曾寄一札。寸心萬里。耿耿常懷。竊惟吏治民生。百事無不從縣令做起。會城首邑。繁劇尤甚。大兄才猷。信可勝任矣。但違教日久。未知於呂新吾定火工夫。嘗爲留意否。有守有爲。勿忘勿助。踏實去做。坦境自來。氣質未化。終是孽根。疑信相參。究成畫餅。學問如斯。事業亦如斯而已。總角之交。落落數人。

死者不能復生病者不能驟愈惟願與大兄堅持此意努力前途他時相見庶可對針耳語近狂心如結已自諒之

答錢督學主敬書

錢督學書云·閣下將母陳情·朝野共羨·僕忝交末·額慶益深·昨保陽試竣·迤邐而南·未得紓道走訪·此心如結·筆所難宣·邑學久經積圮·大人一手仔肩·頓還輪奐·風有位而勵多士·不獨博陵增色已也·自慚淺陋·未足鋪敘盛舉·而耿耿於中·不能自己·撰成六百餘言·繕本一冊·呈請垂鑒·每接十五州郡士子於試文之餘·勸講經學·必舉鄉里賢公卿·使知師法·信而有徵·或可啓其思齊之念·至附近新進後生·惟望大人以時獎掖·異言與法語交致·非敢謂人人改而且繹十得一二·亦蛾子時術之效也·昔溫公居洛十有餘年·里中士子·多師其行·而勉其學·先生有厚望矣·外附奉懷一箋·詩雖不工·亦存風人之致·惟進而教之·

頃得手教兼賜鴻章獎勉交至·情見乎辭·修學碑文·更足信今傳後·附尾名彰·感難言罄·自今津門試竣·駕言徂東·星輶所歷·無非風行雨化之區·顧而樂之·應忘披閱編摩之勞矣·僕近況喜少懼多·問視之餘·開事丹鉛·愧無心得·何敢望溫公後塵·而亦不敢不勉思尚友·目擊鄉俗彫敝·欲稍爲變移·每月與鄉人兩次相見·其朴魯無文者·仿藍田鄉約·勸善規過·以其遵不倍之義·別立一社·酌設規條·俾應舉諸生·略知因文求道·惟是窮鄉晚進·絕少殊尤·匪但篤信好學者·求之不得·卽粗通文理·可共佔畢之業者·亦罕其人·自顧德涼·有愧身教·而才力又不足以振之·每遇言諄聽藐之時·則舉學憲之強教悅安·以動其良·乃俯首內恧·或異口同稱·蓋君子之豈弟浹於人心已久矣·千里百里·敢謂比肩·一德一心·無緣覲面·言念及此·不覺望風於邑也·餘不贅·

與鄂虛亭書

僕自陳情歸里後雖知己亦未通一尺素非不相思最切緣僻處荒城鴻魚絕少耳緬惟足下以潔清粹美之資勵深潛純一之學誠無不動忠焉能誨於以上答聖明下孚士庶此誠朝廷之柱石弓冶之箕裘也側聞近日動作純乎用剛夫剛爲天德與時偕行到此地位良非易易惟是職在教諭功在涵養遙企溫恭儉讓之中寓正大直方之體則與大易所云天德不可爲首之義深相契合矣生平所期許朝野所屬望豈復有加於此抑聞之崛起之士以范文正之敦崇風節爲尚貴胄之子以韓魏公之器量深厚爲宜此又理勢之自然匪徒保世承家之謂也僕叨世講夙契以道用布愚衷伏冀鑒擇

上魏景州書

某因母老病深日侍湯藥以致久疏上問雖蒙鑒宥負罪良多遙企道履亨嘉優游桑梓樂育英才學至而老不衰可大可久無悔無悶人得而仰之不得而測之也某竊聞緒論專用力於朱子全書而言語事爲之間仍不免於急迫浮露每思孔孟師弟所以同堂聚首道路追隨歷數十年如一日者蓋以道之大端學之要旨不難於挈綱領而見始末惟是變化氣質涵養德性之功非日日提撕時時磨礪隨事情察而力行之未易幾於周旋中禮之候鄉黨一篇可以微參其義今距講堂僅二百餘里顧以反哺之私負笈無從此某所爲夙興夜寐耿耿而不能忘者也惟望賜之明訓俾得銘座書紳遵循以希晚蓋耳魏景州復書曰誘掖後學是吾等本分亦可以勵老年得有進益所謂教學相長也足下以事親爲大本百行之原已無愧矣又讀考亭書玩味旨趣近而修齊遠而平治俱得至理雖淡淡幾句其中無所不該行之久而無弊

·且平易近人·非高遠難行·自古聖賢之道·首在孝弟·信然·惟望以道自任·彌年德進·久而益茂·後日更遠且大  
也·

上高東軒先生書

冢宰天官也·尙書北斗也·晉位至此可謂殊榮矣·第職掌已非周禮之舊·而山公啓事亦有難言者·以例之所在·既不可易·又難畫一耳·惟是六卿之長·百揆之階·咫尺綸屏·贊襄密勿·啓吾君之聰敬·措天下於磐石·此乃海內之所仰瞻·而故人之所額慶者也·肅槭布賀·伏惟崇鑒·

復高東軒先生書

啓銓旋里·敬悉起居強健·入贊綸扉·主知益深·人望益重·以常存敬畏者當之·不自滿假·下詢芻蕘·一個臣之德量·於茲可見矣·伏念此席·自古稱難者·良以一身一心·與朝廷共得失·則作止語默·皆關社稷之安危·與天下同好惡·則喜怒愛憎·卽係輿情之向背·道無可枉·而誠則必形者也·歷觀前代輔臣·往往以一言一動·一舉一錯·違治體而失人心·非其初念·卽甘蹈於伴食摸稜·大率得君之時·密邇左右·每借從容風議·默化潛移之說·漸流於依違遷就而不覺·薦賢爲大·則謂天下無人·納誨爲忠·則謂言感已淺·皦皦者與容容同歸·此大業之所以不著·而史冊之所以無光也·大儒作相之規模·必有光明俊偉·可法可傳·於不朽者·草野區區·翹首以祝晚節之懋昭矣·前呈朱子與劉貢父書·已盡求人之義·今復恭錄賀陳丞相書·伏祈採擇·

上高東軒先生書

某少習舉業。未知爲學之序。四十以後。備員兩淮。敬承指誨。始得與聞小學之義。比猶未能篤信不疑。十  
餘年來。沈潛反覆。愈覺意味無窮。必明乎此。而後學爲人子。學爲人臣。以安詳恭敬。消除驕惰病根。不至  
隨所居所接而長。所謂修身大法。做人樣子。有裨於世道人心也。甚切亦甚大。今者視學江蘇。訓飭士子。  
講習小學。立限三月。法在必行。務期文勝之地。胥曉然於明倫。敬身之教。須臾離之而不可。終身由之而  
不盡。循循磨礪。而相安於爲下之不倍。庶無憂於三不幸。亦無蹈於三不祥。此則某之所願。上不負主知。  
下不負所學者也。惟當衰病之餘。強勉持衡。歷試常通淮揚諸郡。雖幸免物議。而形神漸悴。大懼隕越。貽  
羞。伏惟切加指示。俾得補過遷善。感甚幸甚。

上望溪先生書

承教學禮手書。反復讀之。彌仰人師爲則。克己之深。誨人之篤。實某父子所中心誠服者。先生幸勿以經  
師爲辭。塵嘉銓於門牆之外也。夫禮教之不行久矣。庸人溺於流俗。離經畔道而不顧。其或稍知自好。有  
志求古者。則羣起而非之。以斯須不可去之道。而搖搖莫定於心。何能獨立不懼。遯世而無悶乎。且古來  
議禮聚訟。言人人殊。欲折衷而定所從。亦難矣。故凡自棄於禮者。牽制於非古之浮言。固多阻於泥古之  
說。而畏其難以推行者。亦復不少。大抵禮之繁縟。已肇於周末。故孔子有從先進之思。而大反本之間。斟  
酌先王之禮。以答顏淵。道可識已。孟子之學。於喪禮經界。識其大者。而能因略以致詳。足徵命世亞聖之  
才。朱子編次儀禮經傳通解。條理井然。誠得古聖賢遺意。顧於喪祭之大。未暇手定。不無遺憾。其在於今。

惟禮無成書難昭法守竊思不知禮無以立論語記以終篇入德之要莫切於是必知禮之本意與禮之節文何者爲古今不易之經何者爲因時損益之道明其源委而斷以心安乃能確然自立而不至耳目無加手足無措否則辨之不明雖欲好古又見世俗之近情方遵此傳又覺他說之爲是甚至莽惑增竄之文白黑莫別誤信邪說必將陷於禽獸而不知禮儀備而津逮末由涉獵多而適以增惑嘉銓懼焉窺見先生言禮諸書辨僞正訛總向本原體貼而摘其大綱節目以垂訓私心竊喜得所依歸冒昧請業適當先生耄而好學嗣事儀禮之時講其節文導之先路俾知所往而務踐其實告之以重任行畏塗至遠期而必要其成立教之終始具矣先生必當以道自任容令嘉銓親叩師門橫經請益感甚幸甚

與元長大司馬書

頃聞入覲定在月內一路周諏咨度入告嘉猷譽處龍光晝日三接不卜可知竊聞古大臣之責難陳善也不敢視一人之喜怒爲可否而必合天下之好惡定是非良以人生本直王道無偏故雖萬乘之尊三公之貴不能與草野爭是非之權伊可畏也公德在人心功在社稷久已輿情胥協拜手贊言之際自不至以一語一事遷就依違失天下之重望但隆名易得晚節難全內外殊公忠無二芻蕘芳曝之獻亦有不敢不然者耳某白

修習齋祠堂啓

習齋先生學貫天人身兼道藝尋親以成大節立教不尙空言魏博燕臺早望關西孔子銅街金市曾識

濟北顏淵四存大絕業之傳。身後偏逢知己兩邑深崇德之報。歲時並入鄉賢。獨念巍煥宮牆既配兩楹之俎豆。荒涼家廟難藏百世之衣冠。來助祭於遐方。上辛空有定日。迎明神於陋室。孝子徒自傷心。茲欲堂構重開。無使飄搖風雨。經營改卜。遠離湫隘。囂塵立制。以渾堅不必丹楹而刻桷。棲神於爽塏。樂觀春祀與秋嘗。阿堵輕揮。難專責於子姓。解囊遙贈。實厚望於同人。漫比結緣廣求種福。惟期好德共俾成功謹啓。

聘安定書院山長啓

洪惟年老先生。聞世奇英。中朝偉望。雕龍繡虎。文章久重於雞林。附翼扳鱗。姓名早標於鴈塔。接心傳於洙泗。詩書禮樂。藹然善氣迎人。普教澤於東南。遠邇親疏。宛若春風被物。允樹人間之楷模。洵稱天上之神仙。某任負鹽梅才慚黼黻。三年淮海。絕少持籌治賦之謀。千載遭逢。實切爲國儲才之志。爰開書院。欲仿鵝湖鹿洞之遺規。敬訪師儒。時親安定紫陽之道範。謹遴下走。恭迓文旌。伏冀惠然肯來。用慰雲霓饑渴之望。從此羣沾樂育。欣歌菁莪棫樸之風。不盡寅虔。臨池翹切。